

1 Tesalonaika

¹ Pol, Sailas agod Timoti ago girek migire yen aŋ Kris midaen Tesalonaika na yan sam na yau da. Aŋ id Tamad Anut iŋ Tubun ak Jesus da sisem amado da. Anut san ilo uyan maror da ka aŋ lo yen yau a.

Tesalonaika tamolpein sad ilo rumok aenta dabai ipidinai da

² Pempem maŋ aŋ niŋemi wo Anut ilo uyan mupani dak, saen fidian ibinawan o mugudani da.

³ Aŋsam ilo rumok an kagin uyan ak aŋ lo igane ilasa da. Aŋ nug niŋen o amat agog urat dabai mok nug abinawi san agane da. Aŋ dam aŋanem tini ganei idsad Tubun ak Jesus Kristus lo yan niŋen o kagin an iginian go muruan naok fidian lo atur dabai da. Ago tag maŋ aŋsam kagin an niŋen o id Tamad Anut ru muruepi wo iloma ta isali na da.

⁴ Teig muroug, maŋ maloŋ ak, Anut buben ipanaŋ go ipilianaŋ a.

⁵ Man dugo, saen maŋ aŋsam na mupalug malama mok nam aban mile ya, ru uyanan mufulale man ru kawan ago tia ya. Tia geig, maŋ Anut san dabai aŋ lo mile agog Awan Urgun dam aŋ luluŋam log iŋsan ru ilom tubun mi isue ya. Maŋ tamol dugo yak, agod aŋ niŋemi wo maŋsama kagin aŋ luluŋam lo migane se yan aŋ aloŋ uyanan a.

⁶ Aŋ maŋsama kagin agod Tubun ak san kagin da agam go ari a. Gidad muruan tubun mok aŋsam na ilasa se yak man Awan Urgun aŋ ibiaŋsag aŋ ilo

uyan da isuda geig a. Kagin ago yan lo mañsama bilaluŋ aŋjane ya.

⁷ Fidian aŋsam kagin duloŋ a. An lo ilo rumok tamolpein Masedonia nag Akaia na dam, gamu aŋjanem kagin dututuŋjani da.

⁸ Aŋ ru afulale yan lo, bilaluŋ a Tubun ak niŋen o yan, nek ibol dou san liliŋan yau dak igo woŋ ifufurak yau a. Ru an Masedonia nag Akaia na mi ta yau na ya, tia, aben fidian iŋjane ya. Aŋ Anut niŋen o ilom rumok dan fidian duloŋ pasik a. An niŋen o maŋsema ru ta aŋ niŋemi wo mabol san urat amama tia ya.

⁹ Tia, iŋsed mi aŋsam mala parek naok dugo yak apanama yan niŋen diŋjeneŋ ilasa da. Aŋ bui adi sad tubudi lo adaŋsag, Anut mi ilom apani a. An lo gamu Anut e rumok di kisaek o lian en paen na amado dugo, iŋsan urat tamolpein mok alasa yak, an niŋen o diŋjeneŋ da.

¹⁰ Ago dugo aŋ, Anut san Nanun Jesus, kumaen panu ibiseip imul o dan niŋen o malam aganeg amado den, an niŋen o dam diŋjeneŋ da. Iŋ gubak mi imat go Anut mateŋ aben lo ipasi iŋjane ya. Anut san tiŋae mumarek murna ilasap lo tamolpein daoŋ ipidinai a, ak man Jesus mateŋ log imasa yan lo, id ilo rumok tamolpein daoŋ an lo patud ipasi wa.

2

Pol san urat Tesalonaika na ya

¹ Teig muroug, aŋsem aloŋ a, wagam aŋsam na mupalu man maŋsama urat kawan ta yau na ya.

² Inug mi Filipai na man, maŋ tinima malan dusueg ilo madai miŋjane man aŋ aloŋ a. Ak man

idsad Anut maŋ bubema dabai ipani an lo, maŋ dabai miŋaneg iŋsan bilaluŋ uyan an aŋsam na mufulale se ya. Maŋ ager tamol adi dida nug mabi midiri se yak man niŋedi wo ta marer se na ya.

³ Maŋ aŋsam na ru miŋiŋeŋ den, maŋ mufurfig ru mabol an ta muri na da. Taida mi, maŋ kankan saian ak mianuk lo yen dan lo ta mabol na da, ago dugo aŋ mirawaŋ o ta migane na da.

⁴ Tia, nek ibol tamol a Anut iŋsan bilaluŋ uyan ak banid lo igane wo awok ipidinai ak igo woŋ, maŋ tamol naok ago mi iŋsan ru miŋiŋeŋ ilasa da. Maŋ tamol ilod miŋane wo ta migane na da, tia, Anut ilo uyan mupani wo urat migane da. Iŋ maŋsama bubema ibitinae da, ago yak niŋen o iŋ iloŋ uyan ak maŋ sewak ru ta mabol na ya.

⁵ Aŋ alon ak, saen maŋ aŋ luluŋjam lo mumado se yan, maŋsama ru lo aŋ ilom ta miŋane na ya, tia geig a. Agod Anut dam iloŋ ak, maŋ mala bulbal san kagin miŋaneg, maŋsama kagin uyan uyan ak paen na mumiani wo ago ta migane na ya.

⁶ Ago dugo, maŋ tamol yaŋak tubun miŋane san urat ta migane na ya. Aŋ malam lo, agod aenta malad lo dam tia ya.

Rumok, maŋ Kristus san bilaluŋ tamol mumado da. Ago yan lo man iloma ibol ak man, aŋ maŋsama yaŋama asini wo musumianŋ dop sema ilobol lo muruan mupanaŋ san niŋen o maŋ idaisuda ya.

⁷ Ak man saen maŋ aŋ da tumado se yan, maŋ kagin mos anda migane se ya, nek ibol pein iŋjanen nanuk kagin ipani dak igo woŋ a.

⁸ Maŋ aŋ niŋemi o mamat saian a, an niŋen o maŋ Anut san bilaluŋ uyan ak mupanaŋ o an iloma lo tubun mi bulbal a, an mi tia ya, tia,

mañsema tinima aŋ lo mabituani san tia ya. Man ata wo? Aŋ mañsama turama mok alasa ya.

⁹ Teig muroug, saen maŋ Anut san bilaluŋ uyan ak aŋ luluŋam lo mufulale se man, maŋ urat dabai mok migane yan aŋ ilom isou. Tidom ad urat migane se yan lo maŋ muruan ta kisaek mupanaŋ man tia ya. Man dugo, tamol ta maŋ kagin ipanama san urat mupani san niŋen o iloma ta ibol na ya.

¹⁰ Saen maŋ aŋ ilo rumok adi luluŋam lo mator dan mañsama kagin gun, agod itaot, aupasek aman tia yak, an aŋ ale ya. Anut dam ago mi a.

¹¹ Aŋ alonj a, maŋ kagin dugo aŋ kisaek kisaek lo migane dan, nek ibol nanuk adi tamad kagin ipidinai dak ago mi a.

¹² Maŋ tan suek ru mupanaŋ dugo, ilo maror san ru murupaian se ya. Ago dugo aŋanem madok tan en lo man, Anut enti aŋ igian go iŋanen grager alep iŋsan kagin panek aben lo aladup fom idaisuda san niŋen o musurnaŋ se ya.

¹³ Taida mi, maŋ nal fidian Anut an niŋemi wo ilo uyan ru mupani da. Ata wo? Gubak mi saen aŋ Anut san ru maŋ awama lo aŋane yan, ibol tamol sad ru onj ta aŋane na ya, tia, ibol Anut sen awan igo woŋ aŋane ya. Rumok, ru an Anut san, an lo aŋ Anut san ru igo woŋ ru an aŋane ya. Ago dugo gamu ru an aŋ ilo rumok adi bubem ilon lo urat igane da.

¹⁴ Teig muroug, aŋ nek ibol Kris midaen Judea na dumado dak onj alasa ya. Inj Kristus Jesus niŋen o ilod rumok dugo inj lo dumado da. Aria, nek ibol inj Juda banid lo madai diŋane na yak ago mi, aŋ

dam sijanem Tesalonaika tamolpein gob ak banid lo ago ajané ya.

¹⁵ Juda tamolpein iñ wagam mi profet adi dufu dumat se ya, agog Tubun ak Jesus dam dufuni imat a, agog gamu mañ dam dukudamag mau a. Iñ Anut tiñae saiak dupani oñ se ya, ago dugo iñ tamolpein fidian dil saian da.

¹⁶ Man dugo, iñ mañsama dal dufutani wo maeg digane da, an lo mañ tamolpein Juda adi tia yak sad na ru mufulale san tia ya. Iñ Anut gob adi patud ipasip iñiliai san dumoi da. Dal an lo iñ pempem aupasek digane dugo sad aupasek tubun geig ilasa ya. Ak man gamu Anut sen yabituani san tiag an lo iñsan tiñae mumarek iñsad na igane ilasa ya.

Polfon Tesalonaika tamolpein yil o da

¹⁷ Teig muroug, saen katukan mi mañ añsam na dukudama, agog mañ nanuk tinan taman an tia yak mumado woj se ya. Rumok mañ añ naomi ta mile na ya, ak man bubema añ lo yen da. An lo mañ urat dabai mok naom mile wo dal abañ mabi da, ago dugo bubema tubun mok naom mile wo itata da.

¹⁸ Ago yan lo mañ añsam na mupalu wo migane se ya, ñai Pol nal wei mok ñibitinae se ya. Ak man Satan mañ naoma dal ifou se ya.

¹⁹ Murna gup, saen idsad Tubun ak Jesus tan na imul dop id naon na tatur an, mañsama mala nouk dugo i? Ago dop mañ ata mel niñen o yousai migane wak i? Ago dop mañsama urat naon miñjane wan dugo i? An nek añsem mi a.

20 Rumok nuñon, aŋsem mi maŋsama girager, agod maŋsama yousai dam mi a.

3

1 An niñen o maŋ malama taida migane san tia ya. An lo maŋ uraru mi Atens na mumado wo iloma isou a.

2 Agog maŋ id teid Timoti mi midinig aŋsam na ipalu ya. Inj bilaluŋ uyan ak Kristus niñen o yan ibol ilasa san urat lo, inj Anut san urat kisaek a. Ago yan lo maŋ miganeg, aŋanem ilo rumok lo dabai ipanaŋ o aŋsam na ipalu ya.

3 Maŋ iloma igo yen, injsan tan suek ru lo, talpein ta aŋ lulunjam lo muruan madai da asini dan niñen o ilon idu dop ta isuk imul na wa. Aŋ alonj uyanan la yak, Anut id muruan nek an tisini wo wagam mi ipilianad a.

4 Rumok gubak mi saen maŋ aŋ da tumado man, ru en murupaian se ya, murna gup tan en san tamolpein id tinid dusue dutare wa. Agog aŋsem malam nam ale dugo kagin an nek ago aŋsam na ilasa se ya.

5 Nai aŋ niñemi wo ilo weiwei ag da ɻumado se ya. Kitek milaen go ɻai ilo maror amag tia ya, an lo Timoti ɻidinig aŋsam ilo rumok niñen o yen dabai boi, tia boi, an kuai ipani wo aŋsam na ipalu ya. ɻaisag rirek man, ur saiak ilo ɻanek san ta ilom injaneg maŋsama urat an kawan a.

Timoti san urat Pol Sailas da dabai ipidinai a

6 Aria Timoti, aŋ ibisawaŋ go gamu geig maŋsama na ilasag, agog ru uyanan ak irupaiama ya. Aŋanem ilom rumok, agod aŋ tamolpein niñedi wo amat dan niñen o ru irupaiamag malonj a. Agog

fon ibol, aŋ pem pem maŋ niŋema wo ilom isou dak, niŋema wo bubem uyan da. Agog irupaiamag aŋ maŋ aliama wo amat da, nek ibol maŋ aŋ miliaŋ o mamat dak ago mi a.

⁷ Fun an lo, teig murooug, gidad maŋ muruan naok wei mi misini dan bo, saen aŋsam ilo rumok niŋen o ru maloŋ man, bubema imasa, agog iloma maror anda mumado ya.

⁸ Amaiak niŋen o gamu maŋ ilo maror da ka mumado wa, man dugo, aŋ Tubun ak lo atur sakar da.

⁹ Maŋ aŋ niŋemi wo idsdad Anut malan lo iloma uyan mok da. An niŋen o maŋ dugo migane wak i? Ilo uyan dugo mok miganepe Anut naon mupani wak i? Maŋ ta idaisuda geig na ya.

¹⁰ Tidom ad maŋ urat dabai mok naom mile wo mumosiai oŋ da. Ago dop aŋanem ilo rumok an mel ta lo katukan dop man, maŋ mel an ka mupanaŋ pe aŋanem ilo rumok idaisuda mi geig ilasa wa.

¹¹ Gamu ɻai idsdad Bai Anut, idsdad Tubun ak Jesus ida igo ɻusumianai da, dalawan dupasi gup aŋsam na mupalu wa.

¹² Tubud en ilo muŋanek san kagin anua geig ak iganep, aŋsam na isuda wa. Ago dop aŋ ka nug niŋen o amat dop teim taomi ilom apidinai ak, tamol fidian dam mi, nek ibol maŋ iloma mupanaŋ dak ago mi a.

¹³ Nai Anut ɻusumiani da, aŋ bubem ɻutum ka dabai iŋane wa. An lo dop, saen idsdad Tubun ak Jesus, iŋanen gun adi dida dumul dupalup, aŋ idsdad Bai Anut naon na atur an, aŋ gun amado dop iŋ aŋ niŋemi wo ru aman tia wa. Mel an fidian Bai

ηugudani dak iganep dilasa panaŋ a.

4

Kagin a Anut malan lo uyanan a

¹ Teig murooug, gubak mi maŋ aŋ kagin dugo aganep lo Anut ilo uyan apani wan niŋen o ru kagin murupaiaŋ la ya. Ago dugo aŋ maŋ awama abig gamu kagin an lo mi amado da. Gamu Tubun ak Jesus lo, maŋ aŋ musumianaŋ dugo mususuŋanaŋ da, aŋ aganep kagin nek an aŋ lulunjam lo dabai apanip tubun ilasa wa.

² Aŋ ru kagin an fidian Tubun ak Jesus wagen lo mupanaŋ an aloŋ pasik a.

³ Anut san ilon man igo ya, in iginian pe gun amado wak, aŋ jeit kagin patum apani wak,

⁴ aŋ kisaek kisaek dam aloŋ uyan pe tinimi atirni wa. Ago dop saen pein anjal dop kagin gun ak mi ari wak, agod kagin naok a tamolpein uyan dubol dan dam ari wa.

⁵ Aŋ nek ibol gob adi bubed gidigidad imasa dop jeit digane wo ilod irae dak ago ta agane na wa. Tamolpein an Anut ta dulon na ya.

⁶ Jeit kagin niŋen o ηabol da, on tei tao lo aupasek ta gane na wa. Nug ηanek lo, agod dam on tei san iwon ta ugam na wa. Ago dugo oŋane tei tinik san kagin lo dabai an tia yan ule dop man, gidad iŋsan madok pitinini wo ta gane na wa. Maŋ kagin naok ago yan fidian niŋedi wo ru kagin igo murupaiaŋ la ya, Tubun en iŋsen tamolpein ensauta a aupasek naok ago yan digane dan naon muruan geig ak ipidinai a. Ago yan lo afon murupaiaŋ da, kagin agane.

7 Man dugo, Anut id kagin dugo dugo nun ipanad dan tiri wo ta igiad na ya, tia, madok gun ak lo mi tumado tator o igiad a.

8 Ak ninjen o tamol ta ru en patun ipani ak man, inj tamol mi patun ta ipani na da. Tia, inj Anut enti a Awan Urgun ipanaŋ dan patun ipani da.

9 Aŋ teim muroumi ilom apidinai san kagin ninjen o man, ɻai aŋsam na ru ta ɻigire san tia, man dugo, Anut kagin an ninjen o ipiteŋanaŋ la ya.

10 Rumok, aŋ teim muroumi aben fidian Masedonia na yan ilom apidinai da. Ak man teig murooug, maŋ ru dabai murupaiaŋ da, kagin ago agane dan ninjen ilom ta isali na wa, tia, kagin an dabai apanip tubun geig a.

11 Ilo isou dabai mok agane dop ate na pasak nam amado wa. Aenta sad ɻineŋ o kabuŋjam ta aduduni ator na wa. Siŋanem banimi mok lo urat agane dop amado wa, nek gubak mi murupaiaŋ ago mi a. Urat tia kawan amado dop Tubun en imul san atitiani man kagin saian a.

12 Dal an lo tamolpein Kris tia yan aŋsam kagin uyan an dilep yanjam diabisa wa. Agod dam, aŋ tamolpein aenta mel ta lo dibinawan o tinim apidinai san urat amam tia wa.

Tubun en imul da wa

13 Aria teig murooug, aŋ aŋaoŋ man maŋ mamoi a. Ilo rumok tamolpein dumat la yan, ninedi wo tamolpein ilo rumok ad tia yak igo woŋ ilomi ta itata na wa. Inj tubun mok ditata da, man dugo, saen iŋsiganed mok ta imat den afon naon ta dile na wak ago ilod isou da. Tamolpein an Tubun ak lo mala nouk amad tia ya.

¹⁴ Ak man id Jesus imat go imasa da yan niñen o ilod rumok a, ago yak niñen o id taloñ a, Anut san dabai lo gup Kris tamolpein dumat la yan injal pe Jesus da dumul da wa.

¹⁵ Mañ itaot Tubun ak awan lo maloñ agog gamu aŋ murupaiañ da. Saen Tubun ak tan en lo imul dop id tamolpein kumaen tumado den, dumat la yan naod na id ta tamug na wa.

¹⁶ Tia, Tubun ak awan tubun mi ru kagin isas-aip, enjel gurman dam iwagiñ dop, Anut san barag diwip tubun mi ibob gup, Tubun ak iñsen kumaen panu ibiseip idu wa. Ago dop tamolpein ensauta a Jesus lo ilod rumok go dumat la yan imug dimasa wa.

¹⁷ Saen an lo id iñsan tamolpein kumaen tumado dan, Tubun en ijiliad pe keit lo tamolpein imug dumat la yan dida tusudap, lak na Tubun en da timtaen titinjaem tutumani wa. An lo id Tubun en da pempem tumado wa.

¹⁸ Ak niñen o aŋ teim muroumi ru en lo ilod dabai apani a.

5

Tubun ak imul ipalu wak o kagin tigane dop tumado wa

¹ Teig muroug, saen dugo boi, nal dugo boi, mel en ilasa san, mañ girek ta migirep murupaiañ san tia ya.

² Añsem alonj la yak, Tubun ak san nal man id taloñ san tia ya, nek ibol gumagam tamol tidom ilasa dak ago mi nal an ilasa wa.

³ Saen ilasa dop tamolpein igo dubol a, “Gamu en maror san saen a. Id ka tumado uyan a. Ager ta

tarer san tile dak tia geig a." Ak man saen an lo dop mel ta daon ipidinai san an iñsad na ilasa kisaek onj a. Nek ibol pein nanuk digansi wo madai diñane dak ago mi woñ a. An lo tamolpein iñ nal an san muruan diriñani san tia wa.

⁴ Ak man teig muroug anj tidom lo ta amado na da, an lo nal en arñsam na gumagam onj ta ilasa na wa, tia geig a.

⁵ An fidian tamol ilalan san agod ad san, id tidom, tidom tubun da san tia ya.

⁶ An niñen o kabelan taen banau, ibol tamol aenta woñ. Gidad malad ipuk pe ilo isou amad da kagin tigane dop tumado wa.

⁷ Id talon a, tamol ñioñ san tidom lo dien da, agod lukluk san tamol, iñ tidom lo mi diluk da.

⁸ Ak man id tamol ago tia ya. Tia, id ad san tamolpein tumado da. Ak niñen o idsad madok an kagin tupani wa. Id ilo rumok tiñanep ilo muñanek da dumui onj tigane wa. Idsad titianek man, mala nouk a Anut injiliad san an yu san katkat kabuñad lo tukudi wak ago mi a.

⁹ Anut iñsan tiñae mumarek tiñane wo ta ipilianad na ya. Tia, id ipilianad man, id idsad Tubun ak Jesus Kristus lo mi patu pasek tiñane wo ipilianad a.

¹⁰ Gubak mi iñ imat go ate id ibinawad san. Ago yak niñen o id kumaen tumado boi, tia tamat la tap, id iñ da kumaen tumado wa.

¹¹ Ago yak niñen o anj kisaek kisaek an ru uyanan lo teim muroumi ru arupidai dop, nug buben dabai apani wa. Nek gamu agane dak ago mi a.

Ru wadan

12 Teig muroug, maŋ ru en murupaiaŋ da. Aŋ tamol luluŋjam lo urat digane den paed na amado wa. Ru kagin dupanaŋ an niŋen yanad abisa wak kududom dam agure wa. Man dugo, Tubun ak iŋ ipilianaig aŋsam gurman dilasa ya.

13 Ago yak niŋen o ilom apidinai a, yanad dam lak na mok abisa wa, fun dugo, urat a digane dan niŋen o ago agane wa. Aŋ dam anek anek atem maror nug lo apanip amado wa.

14 Teig muroug, saen tamol ta urat igane wo ilon isali tap, dal an saian ak ago ru kagin arupei wa. Tamol a buben irer dan dabai apani wa, agod tamol a iŋsan ilo rumok dabai amad tia yan abiai sakar a, kabelan dideg diau banau. Nug kagin apani wo ilom ta isali na wa. Maŋ kagin ago agane wo mususuŋanaŋ da.

15 Nug ale wo uyanan a, saen tamol ta aenta lo muruan igane tap tamol muruan isini an naon ta igane na wa. Nug kagin apani wak niŋen o maeg agane wa, agod tamolpein a ta Kris na yan dam kagin apidinai a.

16-17 Aŋ pempem ilom uyan dop, pempem aguduani wa.

18 Aŋ ata mel uyan boi, saian boi, ilasa dop pempem Anut ilo uyan apani wa. Man dugo, aŋ Jesus Kristus san tamolpein tap ago agane wo Anut ilon ago ibol da.

19 Aŋ Urgun san yai tinimi ilon lo ta agane imat na wa.

20 Profet ta iŋ Anut san awan iŋanep ŋiŋeŋ an ibol ilasa dop man, aŋ ru an ru kawan ak ago ilom ta isou na wa.

²¹ Tia, aŋ mel fidian abitinae gup, mel uyan ak mi abituani wa.

²² Agod kagin dugo dugo saian ak agane san man amoi a.

²³ Anut sen mi iŋ maror san fun. Iŋsen mi iganep aŋ ka gun alasa pasik a. Agod iŋ ka aŋsam ur, ŋutumi agod tinimi tan en san kagin ipidinai a. An lo saen Tubun en Jesus Kristus imul ipalu wak aŋ uyanan geig amado wak tinim aupasek an tia ya.

²⁴ Anut aŋ igian a, iŋsen pempem mi siganen ru iganuri da, ago yan lo ru dugo ibol ak ago mi, mel an igane ilasa wa.

²⁵ Teig muroug aŋ Anut san na aguduani dop iŋ maŋ ibinawama wa.

²⁶ Aŋ teim taom Kris ak fidian musuk gun ak apidinai a.

²⁷ Nai ru dabai en Tubun en yaŋan lo ŋabol da, girek en tumanek lo fidian naod na asuti ilasap dulon a.

²⁸ Tubun en Jesus Kristus san ilo maror ka aŋ da amado wa.

**Anut san bilalun foun
The New Testament in the Takia Language of Papua
New Guinea
Nupela Testamen long tokples Takia long Niugini**

Copyright © 1999 The Bible Society of Papua New Guinea

® Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 18 Mar 2025 from source files dated 31 Aug 2023

757b3e4e-2023-5b45-893a-ee9294ddeb9d